



Terenga 2: Hōtaka 26 – kūmuri tūingoa

Kei ngā ihoiho o ngā tihi whakarongo kōrero o Te Ika a Māui tae atu ki Te Waipounamu, nau mai anō ki tā tātou hōtaka whakatairanga i te reo tuku iho o tūnohunu mā.

Hei Mahi Whakarongo

Kua tīpakohia tētehi wāhanga o te uiui a Ruia Aperahama i a Hone Kaa mō ngā āhuatanga e pā ana ki te whakapono. Anei ngā pātai hei whakautu mā koutou.

1. He aha ana whakaaro ki te kupu 'rangatiratanga'?
2. Tuhia ngā tūingoa whai whiore pēnei '-hanga', '-tanga', aha rānei.
3. E hōhā ana ia i te aha?

He Whakamārama

Ki te tāpirihia te whiore '-nga', '-tanga', '-ranga', '-hanga' ki tētehi tūmahi, tūāhua rānei ka huri te kupu hei tūingoa, ā, ka whai i ngā ture o te tūingoa. Tirohia ēnei huringa:

tae	to arrive	taenga	arrival
haere	to go	haerenga	the going; journey
kawe	to carry	kawenga	responsibility
kite	to see	kitenga	sight
oho	to wake up	ohonga	the awakening
tū	to stand	tūnga	position, standing

Kia mōhio ai koe mehemea ka hāngai te pūriro 'ā', 'ō' rānei ki tētehi tūingoa hanga pēnei i ēnei: 'taenga', 'haerenga', 'kitenga', me whakaaro koe ki te tikanga o te pūtake o taua tūingoa, arā me whakaaro ki te āhua o te kupu 'tae', 'haere', 'kite'. Anei ētehi kōrero ārahi ka hāngai i te nuinga o te wā:

- Mehemea he **tūmahi whiti**, kei raro i te 'A' Nō te **kawenga** a Pita i te pēke, ka rongo ia i te taumaha.
- Mehemea he **tūmahi poro**, kei raro i te 'O' Nō te **haerenga** o te whānau, ka mokemoke te tama.
- Mehemea he **tūmahi wheako** kei raro i te 'O' Nō te **rongotanga** o te kaiako, ka wheke ia.
- Mehemea he **tūāhua**, kei raro i te 'O' Nō te **matenga** o te kuia ka tangi te hapū.

Hei Manatu

Ko te whakamahinga o te kupu 'uaua' te kaupapa hei manatu mā tātou i te rangi nei. Mehemea ka tīmata te rerenga ki ngā kupu 'He uaua'...he aha ngā momo kupu ka rangona?

- a. He uaua ki te mahi pēnā.
- e. He uaua māku ki te kōrero.

E whakapae ana au i ahu mai ēnei whakatakotoranga i te reo Pākehā e kī nei, *it's difficult to do something*.

Anei kē te taurira hei whai mā tātou:

- i. He uaua **te** mahi pēnā.
- o. He uaua **taku/te** kōrero.

Ka whai hoki ngā kupu 'pai' me 'māmā' i tēnei whakatakotoranga.

Hei Mahi

Whakamāorihia ēnei rerenga:

1. When Tere woke up, he felt weak.
2. When the group arrived at the marae, they were welcomed.
3. When I saw you, I cried.

Whakautu:

1. Nō te ohonga ake o Tere, ka ngoikore tana tinana.
2. Nō te taenga atu o te tira ki te marae, ka pōwhiritia.
3. Nō taku kitenga i a koe, ka tangi.